

BRIEF VAN PAULUS AAN DIE GEMEENTE IN LAODICEA

Deur die Innerlike Woord ontvang en opgeskrywe deur Jakob Lorber

Voorwoord

In die brief van Paulus aan die Kolossense word gewag gemaak van 'n brief van hierdie apostel aan die gemeente van Laodicea, wat ook vir die Kolossense van belang sou wees:

'En wanneer hierdie brief deur u gelees is, sorg dan daarvoor, dat hy ook in die gemeente van Laodicea gelees word en dat u dié van Laodicea ook lees.' (Kol 4: 16)

Hierdie brief van Paulus aan die Laodicense soek ons egter tevergeefs in die Nuwe Testament. Ondanks ywerige naspeuring moes hy tot nou toe as verlore beskou word. Mense het getrag om die brief aan Efese vir die verdwene geskrif aan te sien, maar hierdie hipotese het nie houbaar geblyk nie.

In die jaar 1844 word hierdie verdwene brief van Paulus deur Jakob Lorber via die weg van die Innerlike Woord terug ontvang. Dit is interessant om hierdie brief aan die gemeente te Laodicea met die ander briewe van Paulus, die apostel, wat in die Nuwe Testament voorkom, op taalkundige ooreenkoms te vergelyk. By 'n objektiewe beoordeling sal mens die karakteristieke kenmerke van die bybelse Paulus-briewe hier sonder twyfel aantref.

By die lees sal blyk om watter rede hierdie brief deur die kerk van die vroeë Middeleeue uit die bybelse geskrifte verwyder is. Die Laodicense het, net soos die Kolossense, van die suiwerste christendom in 'n seremonieël verwêreldlike christendom verval. Paulus wys hulle in sy brief in vlammende bewoording tereg. Die kerk uit die vroeë Middeleeue het hierdie brief as 'n aanklag vir haar eie wêreldlike optrede gevoel en hom daarom eenvoudig net laat verdwyn.

Dit is sekerlik nie sonder betekenis dat die vermiste brief sedert baie eeue nou in ons tyd, aan die vooraand van 'n nuwe tydperk, weer in sy woordelike teks op hierdie besondere wyse aan die mense teruggee word nie. Mag hy daarom nou tot die oral nagestreefde vernuwing van die godsdienstige lewe dien.

“Die tyd kom en het nou reeds gekom, dat die waaragtige aanbidders die Vader in gees en in waarheid sal aanbid; want die Vader soek sulke aanbidders.” (Joh. 4:33)

Die uitgewer.

Hoofstuk 1

1. Paulus, deur die wil en genade van God, 'n

apostel van Jesus Christus, en broeder Timotheüs, 2. aan die heilige gemeente van Laodicea en al haar gelowige broeders in Jesus Christus en aan die wyses in God se gees. Genade sy met u en ware vrede van God, ons Vader, in die Heer Jesus Christus!

3. Ons dank, loof en prys te alle tye vir God, die Vader van ons Heer Jesus Christus en het groot sorg oor u en bid voortdurend vir u tot God.

4. Want ons het deur die gees van die Heer en deur broeder Epaphras en deur Nymphas verneem, dat u in baie opsigte afvallig geword het

5. en u 'n biskop en 'n geestelikheid gekies het en van Christus 'n afgod wil maak - en besluit het op 'n bepaalde huis, 'n vasdag en versierde klere wat omboor is

6. dus, soos dit gedeeltelik onder die heidene en Jode was, toe die besnydenis van die vlees nog vir God gegeld het, wat hy onder vader Abraham voorgeskryf het as 'n teken van die lewende besnydenis van die gees deur Jesus Christus in u.

7. Dit sê ek nou vir u, sodat u kan ervaar welke stryd ek het, wie u nie persoonlik gesien het nie, om u ontwil moet voer,

8. en sodat u ernstig in u hart vermaan sal word en dan u liefde sal versterk, waarin alle rykdom van die seker wete is om die groot geheim van God die Vader in Sy Seun Jesus Christus te verstaan,

9. waarin tog alle skatte van wysheid en lewende kennis van die gees verborge is.

10. Ek vermaan u egter daarom, dat niemand u sal verlei deur verstandelike en mooi redevoeringe en heidense filosofieë nie.

11. Want die verstand is ook aan die diere eie, net soos die filosofie aan die heidene eie is, wat aan dooie afgode offer.

12. U is egter deur die dood van die Een gekoop tot die ewige lewe in God, die Vader; hoe sou u dan u hart, wat 'n woonplek van die Heilige Gees geword het, weer aan die gees van die dooies wy?!

13. Ook al is ek nie liggaamlik by u nie, so is ek tog steeds in die gees by u deur die mag van Christus in my, en sien u geloof en u werke

14. en wil u daarom ernstig vermaan en laat sien hoe so baie van u, liewe broeders, in 'n groot dwaasheid verval het; want hul drogredenasies ken ek en ek weet wat hulle wil doen.

15. Dog is dit so, dat u aan Jesus Christus moet vashou soos u Hom deur my ontvang en aangeneem het en dus moet lewe volgens die evangelie, wat ek getrou vir u gepredik het,

16. en vas daarin gewortel moet wees en standvastig wees in die geloof, dus soos wat ek dit vir u geleer het in die Gees van ons Heer Jesus Christus, die lewende Seun van God, wat heers aan die regterkant van die Vader in ewigheid.

17. Maar soos u nou wil word en dit wil hê, is u teenstanders van Christus en Sy Woord! -

18. Wat wil u dan? Sou u dan opnuut weer slawe en kortgehoue knegte van die wet, van die sonde en van die dood wil word, nadat ons van dit alles vry geword het deur Jesus Christus?

19. Luister na my! Ek sê vir u: Sien goed toe dat u nie saam gesleep en beroof word deur u wêreldse wysheid en inhoudlose leer van diegene onder u wat meer die Romeine en die blinde Jode vrees as die Heer van die Heerlikheid, wat ons verlos het en deur wie hemel en aarde en alle dinge gemaak is!

20. Toe ek by u was, het u wysgere my gevra welke verskil daar is tussen God en Sy Seun Christus. - Ek het vir hulle gesê:

21. 'Hoor broeders: God is Eén en Christus is Eén; want as daar slegs één God is, dan is daar ook één Christus. Welke verskil sou daar wees tussen God en Christus? - God is die Liefde en Christus is die Wysheid in God of die Lig, die Waarheid, die Weg en die ewige Lewe!

22. In Christus woon die gehele volheid van die Godheid self en ons is volkome in Hom; want Hy is die fondament en die hoof van alle heerlikheid, van alle mag en krag, van alle wêreldlike owerhede en `n vors van alle vorstedomme van die aarde.'

23. As ek, Paulus, dit in die gees en in alle waarheid vir u gesê het, hoe kan u uself dan nou deur die leer en die wette van die mense laat verblind?

24. U is sonder hand en mes besny deur die Heilige Gees, deurdat u u sondige lewe afgelê het, wat `n kragtige wortel in u stoflike liggaam was; en dit was `n ware en lewende besnydenis in Christus!

25. Want toe is u in u sondige vlees met Christus vir die wêreld begrawe deur die doop met die Heilige Gees en daardeur met Christus nuut opgewek deur die lewende geloof en deur die liefde tot Hom.

26. Wat wil u dan nou weer met die ou besnydenis, wat beëindig is; wat met seremonie, wat nou sonder waarde is, omdat Christus al gekom en opgestaan het en ons in Hom; wat wil u met die sabbat, terwyl Christus elke dag gewerk het en nog werk en daardeur elke dag tot `n dag van die Here gemaak het en nie die sabbat gehou het nie?!

27. Maar ek ken u, daarom sê ek vir u, dat Christus, soos Hy is, arm wil wees in die wêreld, maar u wil goud hê! Daarom wil u `n gebedshuis, `n feesdag en versierde klere hê!

28. U sê dat God deur Christus, Sy Seun, die wette van Moses nêrens afgeskaf het nie, maar dit op die laaste avondmaal veelmeer bevestig het en daar dus ook `n offerseremonie sou moet wees.

29. Ek Paulus, `n ware deur God uitverkore apostel van die Heer, is tog vervul met die Gees van God; hoe is dit dan dat God se Gees dit nog nooit vir my laat weet het nie, terwyl ek tog vóór my roeping `n hartstogteliker tempeldienaar en -kneg was as wat u ooit gewees het?!

30. Ek sal u nou dit sê: Nadat God se Gees my opgewek het toe ek na Damascus getrek het om die jong gemeente van Christus aldaar te vervolg, het ek eers - in my blindheid selfs - gesien, dat die Heer in gees en waarheid geëerbiedig en aanbid wil word, maar nimmer in `n seremonie nie!

31. Want niemand wat Hy tot Sy diens geroep het, het Hy eers blind gemaak nie; maar ek moes eers blind word, sodat ek alles wat van die wêreld is, sou verloor, om alvorens slegs één van sy geringste dienaars te kan word!

32. Waarom moes ek eers blind word? Omdat my hele wese in die materie van die tempeldiens begrawe gelê het, en sodat dit daarom van my weggeneem sou word.

33. As die Heer my egter sonder seremonie, dus in my blindheid geroep het, hoe sou ek dan ooit van die Avondmaal `n seremonie kan maak?!

34. Of is dit nie soos wat die Gees van God my altyd geleer het nie?! -Wie die lig van die oë het, kyk na wêreldlike seremonies en verlustig hom daaraan;

35. maar vir die blindes is die gehele wêreld met haar seremonies verby en ook die ou tempeldiens en alle versierde klere!

36. So is dit `n ewige waarheid dat die Heer my nie geroep het vir `n hernude instelling van die seremonie nie, maar vir die oprigting van die harte, waaromheen die Satan duisende jare al sy swaar kettings gesmee het;

37. en om aan iedereen die vryheid van die gees te verkondig, die vrede van die siel, en daarmee die ou harde bande van die dood in Christus, die Heer te verbreek.

38. Maar wat baat my leer vir u en my, wat baat die evangelie van God, indien u uself weer vrywillig in die ou dood wil begewe?!

39. Ek bid u ter wille van u ewige lewe: Laat los wat die ou gevangenskap in Babel aan alle Jode as `n sware erfenis nagelaat het!

40. Sien Babel, die groot hoer van die wêreld, word deur die Heer vernietig; want sy bring baie volkere die dood! Wat sal u egter wen, indien u van Laodicea `n nuwe Babel wil maak? Daarom, laat dit los wat opnuut die gruwel van die verwoesting sou kan veroorsaak, - waarvan Daniël geprofeteer het, toe hy op die heilige plek gestaan het!

41. Maar Christus het u lewend gemaak toe u dood was in u sondes en in die voorhuid van u vlees, en het u alle sondes kwytsgekeld wat u steeds, sowel in die tempel, as in u voorhuid, begaan het.

42. Hy het die bloedige handskrif uitgewis, wat teen ons almal getuig en wat ontstaan het deur wêreldlike leerstellinge, en ons name was met die handskrif geskrywe in die boek van die wêreld, in die boek van die oordeel en in die boek van die dood, maar Hy het dit aan die kruis genaël.

43. Waarom wil u nou die deur God Self uitgewiste,

aan die kruis van die oordeel, van die smaad, van die vloek, van die dood vasgespykerde bloedskrif weer daar afhaal en u nuwe name in Christus verwissel vir die oue, wat met die bloed geskrywe was in die boek van die oordeel?

44. O, julle blinde dwase van alle dwaasheid! In Christus het u vry geword - en wil nou weer slawe en knegte word van die sonde, van die oordeel en van die dood! Het u dan nie gehoor dat dit wat aan die kruis geslaan word, vervloek is nie?!

45. Maar Christus het u skande, u smaad, u sonde, u oordeel en u dood op Hom geneem en het Hom vir u as 'n vervloekte aan die kruis laat slaan om u almal die volle vryheid in God te skenk; en sodat u in ere sal lewe, neem Hy al u skande en smaad saam na die kruis.

46. O, wat het u tog daartoe verlei, u wat die lewende geword het in Christus, om uself nou weer opnuut in die dood te begewe?

47. Waarmee sal ek u vergelyk, wat u sou kan tref soos 'n goeie gooi die doel? Ja, u is in die opsig 'n wulpse hoer wat in 'n stad woon en tog 'n dogter van 'n goeie huis is!

48. Luister na my en knoop dit in u ore! Wat baat 'n hoer se goeie afkoms haar as haar vlees tog geiler is as die vet van 'n gemeste sondebok?

49. Sal sy nie in haar vertrek brandend van hartstog op en af hardloop en dan by die een, dan by die ander venster haar halwe lyf na buite steek en haar wellustige blikke na alle kante laat skiet om te kyk of sy die een sien vir wie haar liggaam van begeerte brand?!

50. En sien sy hom, dan sal sy hom deur die skalkse gloed in haar oë laat merk wat sy wil en sal so deur haar begeerte tienmaal meer met hom sondig as 'n hoer met haar minnaar in die bed van die skande.

51. O Laodiceses, sien, dit is u beeld! - Weet u egter wat die eerlike menende bruidegom met so 'n hoer sal doen as hy haar huis verbygaan en haar skandelijke gedrag sien?

52. Hy sal haar onmiddellik uit sy hart en sy mond ban en haar voortaan nie meer aansien nie, ook al sou sy in die grootste nood raak!

53. Netso sal die Heer ook met u doen, want Hy het 'n nuwe lewende tempel in u hart opgerig, van waar u verlangend na Hom sal uitsien; maar u versmaad hierdie tempel, die heilige vertrek, en hardloop van suiwer wêreldse lus na die venster van die oordeel om u daar vanweë die goud, die aansien en die heerssug te verlustig aan die wêreld, omdat u begerig is na dit alles!

54. Maar ek sê vir u: Die Heer sal Hom terugtrek en sal u in allerlei hoerery, in die ou oordeel en die ou dood laat verval, indien u nie onmiddellik omkeer en volledig u selfgekoose geestelikheid, u tempel, u feesdae en u versierde klere loslaat nie; want dit alles is vir die Heer 'n gruwel soos van 'n

wellustige hoer, wat in haar hart erger is as tien hoere van Babel!

Hoofstuk 2

1. Laat daarom u gewete deur niemand of niks meer beswaar nie, nóg deur 'n nie-geroepe biskop en priester (d.w.s. deur God), nóg deur 'n feesdag, nóg deur die ou sabbat en nuwemaan,

2. nóg deur 'n tempel, nóg deur 'n plegtige offerande en versierde klere en ewemin deur spys en drank!

3. Wees matig met eet en drink, want dit is goed vir gees, siel en liggaam en is aangenaam vir die Heer;

4. maar indien iemand spreek, leer en eis: 'Hierdie en die spys mag nie geëet word nie, omdat dit volgens Moses onrein is!' -

5. dan sê ek daarenteen: Moses en die profete is in Christus vervul en bevry; maar vir ons het die Heer geen spyse verbied nie, terwyl Hy Self met sondaars en tollenaars geëet en gedrink het

6. en uitgeroep het: 'Wat jy eet verontreinig u nie; maar wat uit u hart kom, soos bose taal, bose begeertes, gierigheid, jaloersheid, doodslag, toorn, vreet- en swelgpartye, hoerery, egbreuk en sodanige, dit is wat die mens steeds verontreinig!'

7. Aangesien ons egter van Hom Self, die enige Heer van alle heerlijkheid, so 'n evangelie het, hoe groot dwase sou ons dan moet wees indien ons onself opnuut vrywillig onder die ou harde juk sou begewe?

8. Wat beteken dit nou nog, wat vir Moses gegeld het as 'n voorafskadu van dit wat voor ons oë gebeur het, vir ons, wat immers met Christus en in Christus tot één liggaam geword het?

9. Ek vra en besweer u selfs: Rig u nie na iemand wat uit eiemagtige keuse rondloop in alle nederigheid en algehele vergeesteliking soos van die engele in die hemel, waarvan hy egter nooit iets gesien of gehoor het nie, en wat daarom slegs maar opgeblase is in sy vleeslike gesindheid,

10. en hom nie hou by die hoof, van waaruit die hele liggaam deur ledemate, gewrigte en senings daadkrag verkry, om dit wedersyds in stand te hou en saam te bind, en so tot 'n verhewe wasdom kom,

11. maar hom slegs hou aan sy sinne, wat vol is van vuilheid, van eiebelang, bedrog en leuens, heerssug, gierigheid en jaloesie!

12. En so is dit ook presies met hom wat homself by u wil opwerp asof hy geroepe sou wees deur die Heer en deur my en vervolgens deur u uitgekies!

13. Maar Ek sê hier tot u almal: Hy het die gees van die duiwel in hom en verkeer onder u soos 'n wolf in skaapsklere en as 'n hongerige, brullende leeu, wat baie naartig probeer om u op te vreet en in te sluk!

14. Verdryf hom daarom spoedig van sy plek en

wend u weer tot Nymphas, wie se huis `n ware gemeente van Jesus Christus is!

15. Want u almal het vir die wêreld en haar verordeninge immers gesterwe met Christus; om watter rede sou u uself dan nou weer laat vang deur wêreldse statute, asof u nog in die wêreld sou lewe?!

16. Die huis van my goeie broeder Nymphas het getrou gebly in sy vryheid, soos ek dit aan hom gegee het deur Jesus Christus, die Heer van die ewigheid.

17. Nymphas het die wolf herken, soos ek hom herken het deur die gees van God, wat in my is en my steeds dryf, trek en leer insake die verskillende dinge van die enige ware Wysheid in God, net soos ook broeder Nymphas.

18. Daarom vermaan ek u dan ook met alle krag in `n ware ywer vir Christus die Heer, dat u na Nymphas gaan en weer met sy huis één gemeente word

19. en nie luister na hom wat met `n huigelagtige, vroom gesig sê: 'Raak dit nie aan nie, eet dit nie, neem dit nie ter hand en doen dit of dat nie!' - welke dinge steeds onder die hande afgebreek word en op sigself niks anders is as menslike leerstellinge nie;

20. maar luister na wat ek u sê uit Christus se Gees, wat in my is, sodat u weer vry mag wees en sal word tot waaragtige mede-erfgename van Jesus Christus in die Ryk van God wat in u leef!

21. O broeders, bedink wat diegene u sal baat, wat die skynsel van wysheid het en `n deur homself gekose huigelagtige en skynheilige geestelikheid en nederigheid,

22. en wat sê: 'Indien u `n vrou aansien, het u reeds gesondig; indien u onrein, deur Moses verbode spyse eet, is u die hele dag onrein; en as u `n heiden aanraak en meer as drie woorde met hom spreek, dan moet u dit aan die priester in die tempel meld, sodat hy u voor God sal reinig'.

23. Maar op sigself is hy vol vuiligheid, vol gierigheid en hoerery en dryf in die geheim handel met alle heidene en stel alles in werking om nie die geheime vriendskap met hulle te bederwe nie!

24. Ek sê: Die liggaam het net soos die gees syne nodig; want dit het immers sy behoeftes en eise. Daarom moet u dit in die korrekte mate gee wat God daarvoor bestem het en u voed met dit wat verkrygbaar is; want die liggaam het sy versorging nodig soos die gees haar vryheid. Daarom, wees vry en geen slawe van die blinde dwase wêreld nie!

25. Waarop kan iemand hom wel beroem as hy met sy maag gevas het, maar sy hart volgestop het met bose gedagtes, wense en begeertes?!

26. Sou dit dan nie baie wyser wees om in die hart te vas, as met die maag nie?! Hoe kan u so dwaas wees en u laat wysmaak dat dit vir die Heer aangener is as iemand vis in olie sou

eet as die vlees van `n warmbloedige dier en sy vet in plaas van olie?!

27. Ek sê vir u: Eet met mate te alle tye wat vir u smaak en wat goed is vir u gesondheid. Drink wyn met water, soos ek ook doen wanneer ek dit kan kry, en maak geen gewetensaak daarvan nie; dan sal u ook in die opsig goed handel!

28. Want die Heer het geen vreugde in die vas van die maag nie, maar wel aan die van die hart; as u dag en nag in die hart vas, sal u in gees en waarheid vas!

29. Maar soos wat U wil vas, volgens die huigelagtige leer van hom wat doen asof hy nog maar met een voet op die aarde staan en met die ander al in die hemel, so vas ook alle heidene, wat op hul feesdae die fynste lekkernye eet en meer daarop gesteld is as op `n gewone dag, waarop hulle hul daaglikse kos kry.

30. Maar omdat u nou met Christus opgestaan het, wat maak u uself dan bedruk oor dit wat op die aarde is en waarom trag u om aan die wêreldlike statute te voldoen, wat tog mensewerk is?!

31. Soek wat bo is, waar Christus aan die regterkant van die Vader sit, - dit pas u beter as alle waardelose dwaasheid van die wêreld!

32. As u in die gees opgewek is en opgestaan het met Christus, dan is u immers van bo en nie van benede nie; dus soek dan ook wat bo is, maar nie wat benede op die aarde is nie!

33. Want u het vir die wêreld gesterwe en u lewe is met Christus verborge in God.

34. Wanneer Christus, wat nou u lewe is, Homself egter sal openbaar, dan sal u ook met Hom in heerlijkheid verskyn!

35. Dood daarom opnuut u wêreld, wat in baie gedaantes op aarde is, soos die lede van u liggaam, waarmee u bedrewe is en opnuut weer hoerery, onsuiverheid, skandelijke hartstog, bese luste, hebsug, jaloesie en gierigheid wil bedryf; uit die alles bestaan egter steeds die ware afgodery van die heidene.

36. En vermy in die besonder die leuen, want dit is die naaste afstammeling van die Satan! Lê die ou mens af en trek die nuwe in Christus aan, wat dan vernuwe sal word tot kennis van Hom wat hom geskape het, en wel na Sy ewebeeld!

Hoofstuk 3.

1. Ek sê dus: 'Vermy die leuen, wat die naaste afstammeling is van die Satan!', omdat u nou - soos ek deur Nymphas verneem het en ook deur die Gees van Christus in my verneem - grotendeels op menslike leerstellinge oorgegaan het.

2. Wat is die tempel anders as `n menslike instelling, `n dooie werk van mensehande, dus `n ydel droomwerk, wat dan ook steeds vergaan sodra die oog uit die slaap ontwaak?!

3. En omdat dit dit is, is dit `n leuen, wat u as

voordeel neem om vir uself iets wys te maak en te bedrieg, omdat u dink om God hierin te eer; en u lieg God Self voor, as u dink om Hom daardeur 'n belangrike offerdiens te bewys!

4. Julle dwase! Welke diens wil u dan die Almagtige bewys, wat hemel en aarde al geskape het voordat u deur Hom geskape was?! Wat besit u dan wel, wat u nie eers ontvang het nie; en as u dit egter ontvang het, waarom maak u dan asof u dit nie sou ontvang het nie?!

5. Wil u die Heer dalk 'n aangename diens daarmee bewys, as u Hom in 'n tempel, deur mensehande gebou, aanbid deur seremonies en wierook en deur dooie lang en breedvoerige gebede?!

6. O sien, hoeseer is u deur 'n apostel van Satan verlei! Christus, in wie die volheid van die Godheid woon, is tog Self in die tempel tot die dood veroordeel - waarvan Hy vooraf Self die volledige ondergang voorspel het!

7. Hoe sou Hy dan nou 'n welgevalle kan hê aan dit waarvoor Hy al sy dissipels, en in die gees ook vir my, tog baie gewaarsku het, toe Hy gespreek het: 'Behoed u teen die suurdeeg van die fariseërs en die hoëpriesters!' En u wil nou die ou 'gereghuis', wat vir God 'n gruwel geword het, tot 'n woonplek van die Heer inrig, sodat u Hom daar baie male sou kan doodmaak!

8. Hoe blind en hoeseer aan die wêreld geheg moet u tog wees, dat dit u nie direk opgeval het nie!

9. Is dit dan nie genoeg, dat die Christus één keer vir almal gesterwe het en ons almal nou saam met Hom, omdat ons nog in ons vlees saam met Hom opgestaan het tot die ware kennis van Sy Gees, wat in ons is, en tot kennis van die Vader, wat ons reeds liefgehad het, nog voor die wêreld bestaan het?!

10. Hoe dikwels wil u nog vir Christus doodmaak, Hom, die ewig Lewende, wat ons almal eenmaal uit die dood opgewek het tot die ewige lewe deur Sy heerlike opstanding?!

11. Ek, Paulus, sê vir u: Gaan heen en verwoes die tempel, skrap die vasgestelde feesdag van die kalenders, sit die valse biskop en sy knegte af, wat hom net soos die van Jerusalem deur die werk van u hande wil vetmes en 'n groot yster kas laat maak het, waarin die goud en silwer wat deur u bymekaar gespaar is, bewaar word.

12. En verbrand die versierde klere, wat nou vir God 'n gruwel is; dan sal u reeds daardeur vir die Heer 'n verreweg aangename diens bewys, as wat u self duisend jaar lank in so 'n tempel sou wil laat offer!

13. As u egter beslis 'n welgevallige huis aan God in u midde wil hê, bou dan 'n hospitaal vir siekes, lammes, gebrekkiges, kreupeles, blindes en stommes, en 'n huis vir arme weduwees en wese en 'n huis vir verongelukte vreemdelinge, sonder uitsondering, wie hulle ook mag wees!

14. Neem dit met vreugde en medelye op en deel u seëninge met hulle, soos ons Heer Jesus Christus dit tweemaal gedoen het, toe Hy met Sy oorvloed aan seëninge duisende hongeriges versadig het; dan sal u aan Hom, die enige Heilige, tot u heiliging 'n ware welgevallige diens bewys.

15. Want daar het Hy Self oor gespreek, toe Hy gesê het: 'Wat u aan die geringste van hierdie armes doen, die het u aan My gedoen!'

16. Wanneer Hy Homself egter baie male duidelik uitgespreek het oor wat vir Hom 'n welgevallige diens is, wat wil u dan doen met 'n diens, wat vir Hom 'n gruwel, 'n walging en 'n pestilensie is?

17. Een Hart vol liefde is egter vir God, die Heer in Christus die enigste tempel wat vir Hom welgevallig is en is Hy liewer daarvoor as 'n wêreld vol tempels soos die van Salomo, wat almal dood is, terwyl die hart lewend is en God en alle broeders kan liefhê! Bou hierdie tempel dus opnuut geestelik in u en offer steeds opgewek hierin vir die Heer!

18. Nie die tempel, nie die seremonie, nie die priester en nie die biskop, ook nie Paulus en sy dissipels; nie die Jood, nie die Griek, nóg die besnydenis van die Jode aan die voorhuid, nóg die tempel van Salomo; dus ook nie die Oergriek, die Skithe, die heiden, die vrye, die kneg; nóg die sabbat, nóg die nuwemaan, nóg die jubeljaar is iets voor God nie, maar slegs Christus is alles in alles!

19. Neem daarom dan alleen vir Christus aan as die uitverkorene van God, as Sy heilige en Sy geliefde, deur die lewende geloof, deur die liefde, deur goedbedoelde erbarming met u broeders, deur vriendskap, vriendelikheid, deemoed, sagmoedigheid en alle geduld.

20. Laat in al hierdie dinge die een die ander verdra en vergewe mekaar van harte indien iemand iets teen die ander het; so sal ook ek u vergewe en die Heer, soos u mekaar vergewe!

21. Kla mekaar nie aan soos die heidene nie, wat hul eie regspraak het, maar wees verdraagsaam en geduldig jeens mekaar en bring u sake in orde met die hart. Dan sal u vir die Heer meer beteken as wanneer u alle wette van Moses - wat moeilik te begryp en nog moeiliker te hou is - stip in ag sou neem; want die Heer het geen behae in die wette van Moses nie, maar slegs in 'n rein hart wat God en die naaste waaragtig liefhet.

22. En bekwaam u daarom vir alles in die liefde, want dit gaan vir die Heer maar net daaroor en dit is die enigste korrekte band met alle voleinding en volmaaktheid!

23. Laat die egte ware vrede van God in en deur die liefde in u harte regeer, in en tot vrede waarin u almal ook slegs geroep is in één liggaam in Christus die Heer; en as u Hom dank, dank Hom dan daarom altyd en ewig in die gees en in waarheid,

24. maar nie in 'n dooie tempel, wat van geen enkele betekenis is vir God, die Heer en Gewer van

die lewe nie, want Hy kyk slegs na die hart en die vrede daarin!

25. Laat die lewende woord van Christus ryklik onder u woon, in alle liefde en egte, volkome wysheid uit haar! Leer, vermaan en stig mekaar wedersyds met allerlei heerlike geestelike dinge en beskouinge,

26. met Psalms van liefde en ander lofsange en lieflike geestelike liedere; maar sing in die hart en maak geen los geblêr met die mond nie, dan sal u vir die Heer aangenamer wees as die ydele geklets van die Fariseërs, Jode en heidene, wat vanweë die goud baie met die lippe werk, terwyl hul harte daarby kouer is as ys!

27. Maar doen alles, wat dan ook, - sy dit met woorde of dade - in die Naam van ons Heer Jesus Christus en dank God die Vader in Hom vir alles; want Hy is die bemiddelaar tussen God en ons, - in Sy hart woon die volheid van die Vader!

28. Hoor nou egter ook julle, vroue van Laodicea: Die Heer ons God in ewigheid wil dat u in Christus die Heer, u manne geheel diensbaar sal wees; want in die man het julle die hoof van Christus.

29. Julle manne egter, het u vrouens op die korrekte wyse lief en wees nie hard teen haar nie; maar maak dit met die liefde tot haar nie so bont dat u daardeur die Heer sou kan vergeet nie - want die liefde tot die Heer moet vry wees, dus net asof u geen vrou sou hê nie.

30. En kinders, wees u ouers heeltemal gehoorsaam in alle dinge wat nie teen Christus is nie; want dit is Sy wil en is vir Hom aangenaam.

31. Julle ouers, verbitter nie die gemoed van u kinders deur harde woorde en mishandeling nie, sodat hulle nie bang vir u word en soos lawwe kruipers en huigelaars word nie; want 'n kennelike stywekop kan u deur liefde ombuig, - maar 'n huigelaar en vleier is onverbeterlik.

32. So sê ek ook tot u, knegte en dienaars van u here: Wees hulle gehooraam in alle dinge, wat nie teen Christus is nie, en nie slegs vir die oog om u here daardeur te vleï nie, maar in ware eenvoud van u hart en in voortdurende godsvrug.

33. Alles wat u egter vir u here verrig, doen dit so asof u Christus die Heer dien in alle getrouheid van u hart - maar nie asof u die mens dien nie, - dan sal u ook eendag van Hom die loon van die heerlikheid ontvang.

34. Wie van u egter onreg aan sy heer doen, die doen dit ook in gelyke mate aan die Heer; die Heer kyk nie daarna of iemand heer of kneg is nie, maar slegs na die werk en die motivering daaragter.

35. Daarom sal die Heer ook eendag die passende loon gee aan hulle wat onreg doen. U kan wel die mense bedrieg, maar die Heer laat Hom nie bedrieg nie; want vir Hom lê u harte steeds oop.

36. Maar vir u werkgewers, sê ek ook dat u goed bedink, dat die knegte en dienaars ook u broeders

is in die Heer; gee hulle daarom steeds wat reg is voor God! Gee hulle op hul tyd die korrekte loon met liefde in Christus en bedink dat ons almal een Heer in die hemel het, naamlik Christus, die heilige God van die ewigheid!

37. Wyk nie af van die gebed nie en bid sonder ophou met danksegging, - egter nie met die lippe nie, maar in gees en waarheid in alle eenvoud van u hart en in waaragtige toewyding en liefde tot Christus, die Heer!

38. Maar bid ook daarna vir my, sodat die Heer steeds die deur van die lewende Woord vir my mag oopmaak en ek voortdurend vir u en alle broeders in Christus mag spreek van Sy groot geheim en van Sy Ryk; want ek is ook nog aan die wêreld gebonde en is 'n baie gewone mens, wat slegs kan profeteer, as die Heer die deur van Sy genade vir hom open.

39. Laat u lewenswandel teenoor elkeen wys en eenvoudig wees - ook ten opsigte van hulle wat ver weg is, Jode en heidene! U moet niemand veroordeel nie - of dit nou oor 'n Skith, heiden, Jood, Griek of nie-Griek gaan, - maar voeg u wys volgens tyd en omstandighede!

40. U woorde moet steeds vir elkeen met liefde gekruie wees en gesout met die ware wysheid uit God; uit hierdie wysheid moet u steeds put as u met iemand spreek, sodat hy sal ervaar welke verskil daar is tussen die goddelike wysheid en die van die wysgere.

41. Ek, Paulus, dink nou dat ek niks nagelaat het om u te laat sien wat daar onder u leef en hoedat dit 'n giftige onkruid is, ja 'n skadelike gifboom, wie se uitwaseming alles verstik; verder het ek dus niks meer vir u te sê nie!

42. Maar dit, liewe broeders, moet altyd 'n ware seremonie onder u wees, dat u in gees en waarheid God, die Vader in die Seun, die eer gee deurdat u Hom steeds bo alles in Sy Seun liefhet, wat vir ons almal uit liefde aan die kruis gesterwe het om ons die kindskap terug te gee, wat die vadere vanaf Adam almal verbeur het.

43. Ek vra u egter om God se wil, dat u waardige vrugte sal voortbring van 'n totale ommekeer van u nuwe heidendom na die lewende kerk van God, wat in u, maar nie in tempels, gewade en in een of ander seremonie woon nie.

44. Die liefde van God en die genade van ons Heer Jesus Christus sy altyd en ewig met u!

45. Hoe dit met my gaan in Rome sal die troue broeder Tychicus u vertel, wat ek nou na u en na die Kolossense sal stuur, wat hulle in dieselfde mate as u deur die Satan laat verlei het.

46. Groet vir my alle broeders en Nymphas en die getroue gemeente in sy huis; want ek getuig dat hy opreg is en net soos ek voortdurend vir julle tot God bid.

47. Groet ook diegene wat in Kolosse is, as u na

hulle toe gaan; want daar is enkeles onder hulle wat u ken, wat te alle tye opreg is en getrou in die geloof en die liefde tot God.

48. As die Kolossense hul brief gelees het, lees u hom dan ook, net soos ek u terwille van die Heer vra, dat u ook hierdie brief aan die Kolossense sal laat lees!

49. Want dit is net so nodig vir hulle as vir u. Ten slotte vermaan ek u skriftelik - soos Tychicus u almal ook mondelings sal sê - dat hierdie brief in alle gemeentes gelees moet word, netsoos die aan die Kolossense.

50. `n Eiehandige groet van my: Gedenk my liefde!
- Die genade van ons Heer Jesus Christus sy met u!

Geskrywe vanuit Rome deur Tychicus en sy metgesel Onesimus, wat beide tot u gestuur is en ook tot die Kolossense.